


Iroun Beretitenti  
**Henry B. Eyring**  
Moan Kauntira n te  
Moan Beretitentii



# Te Rinerine ni KanKakaaitau

**T**amara are i Karawa e tuangiira bwa ti na kakaaitau ibukin bwaai ni kabane (taraa 1 I-Tetaronike 5:18), ao E tangiriira bwa ti na anga ara kakaaitau ibukin kakabwaia ake ti karekei (taraa D&C 46:32). Ti ataia bwa ni kabanea Ana tua a nanonaki bwa a na kakukureira, ao ti ataia naba bwa uruakan te tua e na kairiira nakon te nanokaawaki.

N te aro are ti aonga ni kukurei ao n totokoa te nanokaawaki, ti riai ni iai nanora ae kakaaitau. Ti a tia n nooria inanon maiura te reitaki imarenan te kakaaitau ao te kukurei. Ngaira ni kabane ti tangiria n namakina te kakaaitau, ma e bon aki beebeete te teimatoa ni kakaaitau ni bwaai ni kabane inanon kataakira ni maiura. Te Aoraki, te nanobuaka, ao buaia aomata ake ti tangiriia a roko n taai aika bati inanon mauira. Nanokaawakira e kona ni karawawata nooran kakabwaia ao te karabwarabwa ibukin kakabwaia ake e a tia te Atua ni kaawakin ibukira inanon taai aika a na roko.

Bon te kakaewenako bwa ti na warekii ara kakabwaia ibukina bwa iai iroura te konabwai ni butimwaaibwaai aika tamaroa n akea te karabwarabwa iai. Ngkana arona bwa akea mweengara, amarake ake ti na kanna, ke aia akoi raoraora ao ara utu, ti ataia bwa ti riai n rangi ni kakaaitau ngke arona bwa iai bwaikai iroura.

Ai moaraara riki, n tabetai e bon kangaanga iroura

bwa e na tau ara kakaaitau ibukin te bwaintangira ae moan te kakannato are ti karekei: bungiakin Jesu Kristo, Ana Mwakuri ni Kamaiu, te berita ibukin te mangauti, reken te tai ni kukurei ma ara utu n te maiu are akea tokina, Kaokakin te euangkerio ma te nakoanibonga ma kiingga. Tii man ana ibuobuoki te Tamnei ae Raoiroi are ti na kona ni moana namakinan nanon kakabwaia akanne ibukira ao ibukiia te koraki ake ti tangiriia. Ao ibukin anne are ti kona iai ni kantaningaia ni karabwarabwa ibukin bwaai ni kabane ao n totokoa unin te Atua ibukin te aki kakaaitau.

Ti riai ni bubuti rinanon te tataro bwa te Atua, man mwaakan te Tamnei ae Raoiroi, e na buokiira ni kamaataatai n noori ara kakabwaia ibuakon kataakira. E kona ni buokiira man mwaakan te Tamnei ni kinai ao ni kakaaitau ibukin kakabwaia ake ti butimwaaibwaai n akea ara karabwarabwa. Tera are e a tia n rangi ni buokai bon butiian te Atua n te tataro, "Ko kona n taiaoka ni kairai nakon temanna are I kona ni buokia Ibukim?" Bon inanon te ibuobuoki te Atua e kakabwaiaia tabeman are I a tia n noora oin kakabwaiaku n te aro ae rangi ni mataata.

Au tataro e kaekaaki n te taina ngke te taangana aika I aki kinaia mai mwaaina a kaoai n nakon te onaoraki. Ikekei I kunea te tei ae rangi ni uarereke are e a kona

n tau inanon baiu. Inanon tii tabeua wiikin maiuna, e a tia ni karoaoki nakoina korokoro aika bat. Taokita a tia n tuangia ana karo bwa a na rawata riki korokoro aika kangaanga aika kainanoaki ibukin te buroo ao mamaana ni kateimatoa te maiu inanon natin te Atua ae varereke anne.

Man aia bubuti ana karo, I angan te teei te kakabwaia n te nakoanibonga. Te kakabwaia e airi ma te berita ibukin maiuna bwa e na kabwabwakaki. Riki nakon anganakina te kakabwaia, I karekea te kakabwaia n te nano ni kakaaitau.

Ma ana ibuobuoki Tamara, ngaira ni kabane ti kona n rineia n namakina te kakaaitau riki. Ti kona ni bubuti Nakoina bwa e na buokiira n noora ara kakabwaia n te aro ae mataata riki, n aki tabe bwa tera arora are ti mena iai. Irou n te bong anne, I karabwarabwa n aron are I tuai ni karoia mai mwaaina kamimiin mwakurin buroou ao mamaau. I anga au karabwarabwa iaon kawaiu nakon mweengau ibukin kakabwaia nakoia natiu are I a kona n nooria raoi riki bon kamimiin ana akoi te Atua ao mai irouia aomata aika tamaroa ake irarikiia.

Iaoia ni kabane, I namakina te kakaaitau ibukin te kakoaua n ana Mwakuri ni Kamaiu are e mwakuri inanon maiuia kaaro ake a ingainga ao ngai. I a tia n noora te kantaninga ao ana tangira Kristo ae itiaki n raneanea imataia, inanon naba kataakiia ae korakora. Ao I namakina te kakoaua are ko kona n namakinna ngkana ko bubutia te Atua bwa e na kaotia nakoim bwa te Mwakuri ni Kamaiu e kona n anganiko namakinan te kantininga ao te tangira.

Ti kona ni kabane ni karoa te rinerine n anga ara kakaaitau n te tataro ao ni butiia te Atua ibukin ana kairiiri ni beku ibukiia tabeman Ibuksina—ai moararariki inanon te ririki aio ngkana ti bukamarua ana bong ni bung te Tia Kamaiu. Te Atua te Tama e anga Natina te mwaane, ao Iesu Kristo e anganiira te Mwakuri ni Kamaiu, te kabanea ni kakannato ni bwaintangira ibuakon bwaintangira nako (taraa D&C 14:7).

Kanakoan te kakaaitau rinanon te tataro e kona ni kariaira n noori tian kakabwaia aikai ao ni kabane ara kakabwaia ake tabeua ao n te aro aio are ti na karekea te bwaintangira ibukin te nano ae kakaaitau riki.

## ANGA REIREI MAN TE RONGORONGO AEI

Koreakin bwaai aika ti rinanoi ao kakabwaia e kona ni buokiira n uringii ao n anganiira te bwai are ti kona n oki rikaaki nako iai. Iangoia n titirakinia te koraki are ko reireiniia ni korei bwaai ake a kakaaitau ibukina—ni buokiia n uringii taian kakabwaia ake a tia ni karekei, ao ni kinai kakabwaia n taai aikai, man kantaningai kakabwaia ibukin taai aika ana roko.

Ko kona naba ni kaungaia te koraki ake ko reireiniia n iira ana katooto Beretitenti Eyring ni butiia Tamara are i Karawa ni kairiia nakon temanna are a kona ni buokia ke ni karoa te mwakuri n ibuobuoki.

## RORONRIKIRAKE

### Karekea te Kakaaitau n te Kakaewenako

Iroun John Hilton III ao Anthony Sweat

**T**i na aki tii taetae ibukin warekan ara kakabwaia—ti na karoia! Korei 100 bwaai ake ko karabwarabwa ibukiia. Ngkana e taraa n rangi ni bat, kataa aio:

1. Korei 10 konabwai n te rabwata are ko kakaaitau ibukiia.
2. Korei 10 bwaai aika iai iroum ake ko kakaaitau ibukiia.
3. Korei 10 aomata aika maiu ake ko kakaaitau ibukiia.
4. Korei 10 aomata ake a tia ni mate ake ko kakaaitau ibukiia.
5. Korei 10 bwain te aonaaba ake ko kakaaitau ibukiia.
6. Korei 10 bwaai ibukin te bong aio ake ko kakaaitau ibukiia.
7. Korei 10 taabo n te aonaaba ake ko kakaaitau ibukiia.
8. Korei 10 kukune aika boou ake ko kakaaitau ibukiia.
9. Korei 10 amarake ake ko kakaaitau ibukiia.
10. Korei 10 bwaai ibukin te euangkerio ake ko kakaaitau ibukiia.



# Te Mwakuri ae Raababa Nako

*Kamatebwia te karaki aio ao, n angaraoina, maroroakinna ma tenaan tiitita ake ko kawariia. Kabonganai titiraki bwa e aonga ni buokiko ni kakorakoraia am tiitita ao ni karaoa te Bootaki n Aine bwa iteran maium ae kakammwakuri*

Onimaki • Utu • Ibuobuoki

**T**e Uea, Ana Ekaretia, utu, ao ana botanaomata a kainanoa aia mwakuri aine aika tamara. Ni koauana, Unimwaane M. Russell Ballard n te Kooram n Abotoro are Tengaun ma Uoman e anga reirei bwa “aine n tatabemaniia n te Ekaretia aio ake a tia ni karaoa aia berita ae tabu ma te Uea iai tabeia mairoun te Atua ni buokiiia ni kamaiuia aomata, ni kairiia ainen te aonaaba, ni kakorakorai mweengan Tion, ao ni katea abanuean te Atua.”<sup>1</sup>

Tabeman tiitita a na kona n nanououa ngkana a na kona ni karaioi kouru aika rietaata aikai. Ma n aron are e kabwarabwaraa Eliza R. Snow (1804–87), te kauoman ni beretienti ni kabuta n te Bootaki n Aine, “Akea te aine ae e katukaki n tii ngaia, ao ana mwakuri e rangi n tianaki n te aro are e rangi ni uarereke are e kona ni karaoria nakon katean Abanuean te Atua iaon te aba.”<sup>2</sup> Titita Snow e taekinna naba bwa te Bootaki n Aine e barongaki “ibukin kakoroan bukin mwakuri ni kabane aika tamara ao ni kakannato.”<sup>3</sup>

Iriirakin te Bootaki n Aine e kabuburaa korakoran ara mwakuri n anganakiia n tatabeman nako aine te tai ae angaraoi ni katea te onimaki, ni kakorakoraia utu ao

mweenga, ao ni karekea te mwakuri n ibuobuoki n te mweenga ao ni kabutaa te aonaaba. Ao ni bon arona, ara kekeiaki n arora n tatabemaniira nako ao n aron te Bootaki n Aine e aki tangiraki bwa e na buubura man rangi n rawawata, ma a riai n iai bukiia ao man teimatoa. Mwakuri aika tamara n aron te tataro ibon iroum ao te utu, kamatebwian booki aika tabu ni katoa bong, ao n teimatoa ni kabuburai weteakira man te Ekaretia e na buokiira ni karikirakea te onimaki ao ni katea abanuean te Uea.

Nakoia aine ake a nanououa ngkana ibuobuoki aika a uarereke aikai a kona ni karekea te kaokoro, Unimwaane Ballard e kakoaua: “Ni kabane tiitita ake a tei ibukin te koaua ao te tamara a kauarekeana mwakuri te buakaka. Ni kabane tiitita ake a kakorakora ao ni kamanoia aia utu a bon karaoa ana mwakuri te Atua. Ni kabane tiitita ake a maiu n aroia ana aine te Atua a na riki bwa biikan ibukiia tabeman bwa a na iiria ao n uniki koraan te mwakuri ae tamara are a na taiaki ibukin bwi n ririki aika a na roko.”<sup>4</sup>

## Man Ara Rongorongo ni Kawai

Eliza R. Snow, are e a tia ni mwakuri bwa te tia koroboki

ngke te Bootaki n Aine e kateaki i Nauvoo, e weteaki iroun Beretienti Brigham Young (1801–77) ni mwamwananga rinanon nako te Ekaretia, ni buokiiia bitiobi ni katei Bootaki n Aine inanon aia Uoote.

Titita Snow e anga ana reirei: “Ngkana iai naati aine ao tiina i Iteraera aika a [tianaki] n aia tabo ake a mwakuri iai, a na kona ngkai ni kunea te konabwai ae tau ibukin te mwaaka nako ao te konabwai ibukin karaoan te mwakuri ae tamara ake a bat irovia ibukin karaoan te mwakuri ae tamara. . . . Beretienti Young e a tia ni kauka te kawai ae bat iibukin karaoan te mwakuri ae bati man bongana.”<sup>5</sup>

## BWAAI AIKA A NA TARAAKI

1. M. Russell Ballard, “Women of Righteousness,” *Riaona*, Ritembwa 2002, 39.
2. Eliza R. Snow, “An Address,” *Woman’s Exponent*, Tebetembwa, 15, 1873, 62.
3. Eliza R. Snow, “Aine n Te Bootaki n Aine,” *Deseret News*, Eberi, 22, 1868, 81.
4. M. Russell Ballard, *Riaona*, Ritembwa, 2002, 39.
5. Eliza R. Snow, *Deseret News*, Eberi, 22, 1868, 81.

## Man Booki Aika Tabu

1 I-Korinto 12:4–18; 1 Timoteo 6:18–19; Motiaeia 4:27; Taikan te Onimaki 1:13

***Tera ae I Kona ni Karaoia?***

**1.** N na kanga ni buokiia tiitita  
ake I kawariia bwa a na kinaa  
ao ni mwakuri iaon aia kona-  
bwai n riki bwa taan karaoa ae  
tamaroa?

**2.** N na kanga ni kamanena au  
bwai n tangira ao au tarena aika  
onoti ni kakabwaiaia tabeman?

Ibukin rongorongona riki tabeua,  
nakon [www.reliefsociety.lds.org](http://www.reliefsociety.lds.org).